



**GINJAW KOMITI
WUNPAWNG MUNG DAN SHANGLAWT HPUNG**

**WUNPAWNG MUNG DAN SHANGLAWT HPUNG MASAT
NINGHTOI MUNGGA**

Hkawp,

Mungchying sha kaji kaba ni, Magam gun ni hte KIO Hpung Shang masha ni yawng ngwi pyaw hkam kaja nga mu ga law.

Labau jaw lit hpe jawm gunhpai na matu KIO ngu hpaw hpan wa ai gaw,... Dai ni.. shaning (65) ning hpring saga ai. Ningnan hpaw wa ai kaw na dai ni du hkra a labau lam ni hpe bai ninghtang myit yu ai shaloi KIO Hpung Party gaw **‘Hkring’** nga ai n re. Shawng de **‘Sit’** nga ai re hpe mu lu na ga ai.

Htunghpau sinat hpai lang dap pram majan ladat hte gasat gala ai prat kaw na,... ya, dai ni gaw jak sinat hpan hkum hpai lang lu sai hte Mungkan e mu mada ai gasat majan pinra hta du shang nga sai re.

Mungmasa hkrulam hku nna yu ga nga yang mung, amyu bawsang ni yawng hte lata gindun let UNFC, FPNCC zawn re ai madang tsaw dik mungmasa pinra hta tsap nga saga ai.

Ndai zawn hpyen masa, mungmasa lam ni tsaw dik htum ai ninggam de du wa lu ai gaw, anhte amyu sha ni sha n-ga, kaga amyu sha ni yawng hte myit hkum mang rum galaw shakut shaja sa wa ai magam bungli re majaw, Hpan Karai a shaman chyeju hkam la lu ai hpe myit dum nga ga. Matut nna mung, myit hkum kahkyin gumdin let shakut shaja sa wa ga.

KIO Ginjaw Komiti gaw, ndai ginjang kaja hpe arang shatai let, Mungdan ting hte Munghpawm kata na amyu baw pa ni yawng ngang grin ai ngwi pyaw simsa lam lu la hkra a matu, n sim n sa myit ningchyan shaw shakut nga ga ai.

Gasat majan ni hte hpyen masa lam hpe shangut shakre hpungdim shatsawm lu na matu gaw mungmasa ladat hte bawngban jahkrup ai lam rai nga ai. Raitimung, Myen Mungdan kata kaw ra lata hpawng galaw na hkyen shajin nga ai hpe mu ai majaw grai myit tsang nga ngai.

Hpa majaw nga yang, ndai ra lata hpawng hpe madi shadaw ai hpung hte ninghkap ai hpung ngu nna hpung kaba (2) adan aleng nga pru wa sana re. Ndai hpung (2) gaw aloi ali rai jahkrup la na matu yak mat wa sana re. Dinghku majan mung aten grau galu jat wa na re. Bawngban jahkrup la na matu yak mat na hpe grai myit tsang, myit ba nga nngai.

Ya ten na Myen Mung Asuya uphkanng sairu kata nga nga ai mungshawa ni chyawm gaw, tinang myit hta ra sharawng ai mi rai rai, ninghkap mayu ai mi rai rai, ra lata hpawng lamang ni hta shanglawm ra na chyalu rai nga myit dai.

Marai langai hpra a shanglawm ai lam ni gaw, Mungdan ting hte Munghpawm kata rau jawm nga pra ai amyu sha ni a kam maka dawdan ya ai lam re hpe myit dum ga. Tinang kam sham manoi manat nga ai makam hta myit dum akyu hpyi let teng man lam kaw tsap lu hkra shakut sa wa ga ngu numhtet dat mayu nngai.

KIO Hpung Shang Masha ni yawng hte e, moi chyaloi nhkoi ten kaw nna rau nga rau pra hkrat wa ai Ru Di Amyu sha ni hpe mung tsawra shawang myit kaba hte lata gindun, zinlum nga mu. Kahkyin gumdin nga mu. Maren mara rau jawm nga sa wa na re lam tsun shana dan mu. Anhte rau dung rau nga, ru di masha ni gaw jinghku majing ni re. Hpyen n re ai lam tsun dan nga mu.

Wunpawng Amyu bawsang ni hte Ru Di Amyu sha ni a mying gang nna laknak shakap ya ai ladat gaw n hkru dik ai ladat hte sai garan ginhka ai lam rai nga ai hpe chye na hkawn hkrang wa hkra tsun dan nga mu.

Mungshawa a n-gun hpe rawt malan hpungtun kaba byin lu hkra galoi mung woi awn shakut shaja nga mu.

Majan pa hta sai, salat arang kaba bang nna shakut shaja nga ai myu tsaw mung tsaw share ninghkring ni hpe mung, aten shagu myit dum akyu ara hpyi ya nga nngai.

Majan rau jawm gasat nga ai kaga amyu sha ni, kaga rawt malan hpung ni hpe tsawra myit kaba hte lata gindun ngang ngang, rai nga mu.

Ap nawng daw jau da sai, sai tawng sai pa ni, salu salat ni, hkum hkrang daw chyen ni, myi prwi si ni hte yawn madai ai lam ni gaw kaman li la n rai nga ai. Ndai shabai la n lu sai arang kaba ni hpe lahpawt lama n shatai kau na ga ai.

KIO Ginja Komiti gaw hpyen masa hte mungmasa lam (2) yan hpe pai, hkra sharat shara let ngang grin ai ngwi pyaw simsa lam lu la hkra, gawgap shachyaw nga ai aten rai nga ai. Awng dang hkra galaw shakut shaja sa wa na re.

Mungdan sha ni yawng gaw yak ai hpe chyu sha myit nga ai hku n di ga. Kadai mung kadai hte seng ai makan bungli hta shakut shaja nga ga.

KIO hte rau lata gindun nga ai rawt malan magam jinghku ni a n-gun hte myit marai ni hpe mung kamhpa nga ga.

Aten masa sat lawat hta hkan let tsun shana shabra ai matsun, nsen ni hpe na lasha let madat nga ga.

Hpan Karai a shaman chyeju ni hpe matut nna hkam la let awng dang lam ni a matu n sim n sa shakut sa wa ga ngu, numhtet numra let ngai na mungga hpe hpungdim dat dat ngai.



25/10/2025

Du Daju Jum Nban La

Wunpawng Mungdan Shanglawt Hpung Ginja Komiti Tingnyang Up
Wunpawng Mungdan Shanglawt Kongsì Ningbaw
Wunpawng Mungdan Shanglawt Hpyen Dap Dap Up Daju

Ninghtoi;- 2025 ning, October Shata (25) ya.